

Cundiziuns idealas per dar golf

Cumpetiziun dallas firmas da construcziun Loretz-Savoldelli Tanno-Prevost

■ (anr/ff) La bialaura procura per cundiziuns idealas da semover e far sport. Quella caschun tschaffan era ils golfists e van sils plazs da golf runda per runda. La sonda vargada han 80 sportists da golf dau il Cup dallas firmas da construcziun Loretz-Savoldelli Tanno-Prevost sin la piazza da golf a Selva Sedrun. Savens vegn discutau schebein golf seigi in sport ni semplamein ina spassegiada. Sin la piazza da golf s'entaupan umens e dunnas en tuttas vegliadetgnas e mintgin pretenda che siu giug seigi pretensius, drovi inschign e stenta corporala. Cun las suandontas indicaziuns sa mintgin sez giudicar en tgei categoria ch'el vul tschentar il golf. Las lungheziis dallas piazzas da golf en Surselva ein denter 5550 (Breil) e 6000 (Sagogn) meters. Il golfist fa denton la dubla distanza en in turnier. Buc emblidar las ascensiuns e descensiuns ch'ein considerablas sin nos plazs alpins. El porta in sac cun el ni trai in carr cun si il sac. Tier la frida ch'el dat cul bal ei siu entir tgerp spanegiaus ed il moviment dalla frida drova las musclas da tgaun entochen pei. Tgi che contempla il giuven golfist che smeina la balla entochen 300 meters sa seperschuer tgei forzas che sortan dil slontsch e dalla coordinaziun dil moviment. Ils pli biars golfists ein, suenter aschia ina runda da 18 ruosnas ed in viadi si e giu da sur diesch kilometers, fix e fertig.



Ils victurs e las victuras dil Cup dallas firmas da construcziun Loretz-Savoldelli Tanno-Prevost retscheivan ils premis ord ils mauns dils sponsurs.

FOTO P. DUFF

La cumpetiziun

La cumpetiziun procura per in plascher supplementar e quella vegn mesurada. Las fridas sil bal ein decisivas per il resultat che vegn indicau en puncts. Ei fuss bein adina ils medems che massen cun la plema

sch'ei dess buc in sistem da bonus per ils entscheiders e meins versai golfists. Quei bonus d'experientscha possibilitescha che mintgin sa semesirar cun l'auter e cheutras sa era il pli fleivel e meins versau golfist gudignar in premi.

Aschia eis ei era schabegiau la sonda vargada al turnier dallas firmas da construcziun Loretz-Savoldelli Tanno-Prevost sin la piazza da Sedrun. La golfista Diana Russi da Sedrun ha gudignau la classificaziun netta cun 56 puncts, in resul-

tat extraordinari, bein il pli ault ch'ei vegnius registraus sin la piazza ch'exista prest 20 onns. La meglia golfista ella classificaziun brutto senza il bonus vegn dad Alvagni Bogn, Simone Parpan, cun 27 puncts brutto. Siu um Michael Parpan ha gudignau la classificaziun brutto dils umens cun 33 puncts. Bruno Flepp, il president dil Club da golf Sedrun, ha contonschiu igl emprang ella categoria netta cun 40 puncts. Era ils juniors han dau bein e Valeria Berther (13 onns) ha contonschiu 45 puncts netto. Frederic Cathomas, el absolva la scola da talents a Tenero Tessin nua che golf ei in rom principal, ha fatg in resultat da 30 puncts brutto. Quei suenter il di da finiziun digl emprang onn da scola e la fiasta leutier. Durent la senstupada amicabile suenter il turnier han ils sponsurs offeriu in bien past e la runda da golf ei vegnida commentada da mintgin detagliadamein. Il grond smarvegli e respect dil resultat da Diana Russi ei vegnius respectaus cun in grond applaus.

Resultats

Netta dunnas: 1. Diana Russi Sedrun 56 puncts, 2. Brigitte Bollier Sedrun 42 puncts, 3. Morena Pally Sedrun 41 puncts.
Netta umens: 1. Bruno Flepp Sedrun 40 puncts, 2. Jacob Caviezel club digl exteriur 39 puncts, 3. Reinhold Schmidt Sedrun 38 puncts.
Brutto dunnas: 1. Simone Parpan Alvagni Bogn 27 puncts, umens: Michael Parpan Alvagni Bogn 33 puncts.
Juniors: Valeria Berther Sedrun 45 puncts netto e 24 puncts brutto; Frederic Cathomas Sedrun 30 puncts netto e 30 puncts brutto.

Mini-Europeada el Tirol dil sid

■ La fin d'jamna dils 27 e 28 da zercladur 2015 ha l'uniun cultura ballape rumantsch (CBR) organisau in viadi el Tirol dil sid. A San Martin de Tor han ils Ladins dallas Dolomitas organisau in turnieret che ha valiu sco emprova generala per l'Europeada 2016 che ha liug la stad proxima ella medema regiun. Separticpai ein sper la squadra romontscha era ils Ladins dallas Dolomitas, ils Tiroles dil sid ed ils Slovans dalla Carinzia. La prestaziun sportiva dils Romontschs ei stada buna, malgrad il viadi da rodond quater uras e miez naven dalla Surselva entochen a San Martin.

El miez final ha l'equipa romontscha battiu ils Tiroles dil sid, ils victurs dallas Europeadas 2008 e 2012, suenter sittar penaltis. Igl adversari ha giugau cun in'equipa empau pli fleivla che allas Europeadas passadas.

Tier ils Romontschs han sis giugadurs dau lur «debut». Omisdus equipas han giu bunas pusseivladads da marcar in gol, denton buca dumignau quei enteifer las 60 minutas temps da giug regular. Igl ei vegniu directamein



Ils Romontschs contan lur himni «A Tgalaveina».

FOTOS MAD

tier il sittar penaltis nua che l'equipa dil Grischun ha giu dapli succes e gudignau cun 4:1.

Gia avon havevan ils Ladins dallas Dolomitas battiu en l'auter miez final la minoritad dils Slovans dalla Carinzia

cun 1:0. Aschia eis ei vegniu tier las partidas Tiroles dil sid – Slovans dalla Carinzia el final pign e Ladins – Ro-

montschs per igl emprang. El final ha l'equipa romontscha giugau meglia ch'els Ladins, denton cassau baul in gol suenter in corner. Era cun empruar tut il pusseivel eis e buca reussiu da rumper il schlegn dall'equipa da casa. Aschia ch'els Ladins dallas Dolomitas san sennumnar victurs dalla Mini-Europeada 2015. Davos ils Romontschs han ils Slovans dalla Carinzia contonschiu il tierz rang grazia a lur vitoria encunter ils Tiroles dil sid el final pign.

Suenter la rangaziun ha ei dau ina fiasta cun grillada el local da club sper il plaz da ballape a San Martin. Leu han ils representants dallas quater minoritads linguisticas giu la caschun da brattar cultura e menar ina ni l'autra discussiun. Da buna luna eis ei vegniu cantau e festivaun entochen viaden ella notg, sco usitau tier tals inscuters. La dumengia ei la delegaziun da 18 Romontschs e Romontschs gia turnada a casa. Igl onn 2016 ha l'Europeada liug el Tirol dil sid naven dils 18 entochen ils 26 da zercladur. Leu vegnan ils Romontschs ad esser presents cun in'equipa dad umens e per l'emprema gada era cun in'equipa da dunnas. Marco Cavegn



Ils Romontschs ed ils Tiroles dil sid ein semtgai per il miez final.